



宮闈典第十一卷

太上皇部彙考一

漢

高祖六年尊太公爲太上皇 按漢書高祖本紀高祖沛豐邑中陽里人也姓劉氏母媼嘗息大澤之陂夢與神遇是時雷電晦冥父太公往視則見交龍於上已而有娠漢元年二月項羽立沛公爲漢王五月漢王定雍地九月遣將軍薛歐王吸出武關因王陵兵從南陽迎太公呂后於沛羽聞之發兵距之陽夏不得前二年三月漢王入彭城項羽擊漢軍睢水上大破漢軍審食其從太公呂后間行反遇楚軍羽常置軍中以爲質四年七月項羽自知少助食盡漢遣陸賈說羽請太公羽弗聽漢復使侯公說羽羽乃與漢約中分天下割鴻溝以西爲漢以東爲楚九月歸太公呂后軍皆稱萬歲乃封侯公爲平國君五年二月漢王卽皇帝位六年三月上歸櫟陽五日一朝太公太公家令說太公曰天亡二日土亡二王皇帝雖子人主也太公雖父人臣也奈何令人主拜人臣如此則威重不行後上朝太公擁篲迎門郤行上大驚下扶太公太公曰帝人主奈何以我亂天下法於是上心

善家令言賜黃金五百斤夏五月丙午詔曰人之至親莫親於父子故父有天下傳歸於子子有天下尊歸於父此人道之極也前日天下大亂兵革並起萬民苦殃朕親被堅執銳自帥士卒犯危難平暴亂立諸侯偃兵息民天下大安此皆太公之教訓也諸王通侯將軍羣卿大夫已尊朕爲皇帝而太公未有號今上尊太公曰太上皇注師古曰太上極尊之稱也皇君也天子之父故號曰皇不預治國故不言帝也

九年諸王朝太上皇於未央宮上置酒爲壽按漢書高祖本紀九年冬十月淮南王梁王趙王楚王朝未央宮置酒前殿上奉玉卮爲太上皇壽曰始大人常以臣亡賴不能治產業不如仲力今某之業所就孰與仲多殿上羣臣皆稱萬歲大笑爲樂

十年秋七月癸卯太上皇崩葬萬年赦櫟陽囚死罪以下八月令諸侯王皆立太上皇廟於國都  
按漢書高祖本紀云云

北魏

獻文帝皇興五年冊命皇太子爲皇帝羣臣上尊號曰太上皇帝按魏書獻文帝本紀皇興五年

六月行幸河西秋七月遂至陰山八月丁亥車駕還宮帝雅薄時務常有遺世之心欲禪位於叔父京兆王子推語在任城王雲傳羣臣固請帝乃止丙午冊命太子曰昔堯舜之禪天下也皆由其子不肖若丹朱商均能負荷者豈搜揚側陋而授之哉爾雖冲弱有君人之表必能恢隆王道以濟兆民今使太保建安王陸競太尉源賀持節奉皇帝璽綬致位於爾躬其踐昇帝位克廣洪業以光祖宗之烈使朕優游履道頤神養性可不善歟丁未詔曰朕承洪業運屬太平准岱率從四海清晏是以希心太古志存澹泊躬覽萬務則損頤神之和一日或曠政有淹滯之失但子有天下歸尊於父父有天下傳之於子今稽協靈運考會羣心爰命儲宮踐昇大位朕方優游恭己栖心浩然社稷父安克廣其業不亦善乎百官有司其祇奉嗣子以答天休宣布宇內咸使聞悉於是羣公奏曰昔三皇之世澹泊無爲故稱皇是以漢高祖既稱皇帝尊其父爲太上皇明不統天下今皇帝幼冲萬機大政猶宜陛下總之謹上尊號太上皇帝乃從之己酉太上皇帝徙御崇光宮彩椽不斷土階而已國之大事咸以聞

孝文帝延興二年太上皇詔諸將襲擊蠕蠕帝每月一朝崇光宮 按魏書孝文帝本紀延興二年

二月蠕蠕犯塞太上皇帝次於北郊詔諸將討之虜遁走其別帥阿大干率千餘落來降東部勅勒叛奔蠕蠕太上皇帝追之至石磧不及而還壬子高麗國遣使朝貢三月太上皇帝至自北討冬十月蠕蠕犯塞及於五原十有一月太上皇帝親討之將度漠襲擊蠕蠕開軍至大懼北走數千里以窮寇遠遁不可追乃止帝每月一朝崇光宮

延興三年改崇光宮爲寧光宮太上皇帝歸自北討尋復南巡按魏書孝文帝本紀延興三年春正月丁亥改崇光宮爲寧光宮戊戌太上皇帝還至雲中二月戊午太上皇帝至自北討飲至策勳告於宗廟死王事者復其家秋八月庚申帝從太上皇帝幸河西拾寅謝罪請降許之冬十月太上皇帝親將南討詔州郡之民十丁取一以充行戶收租五十石以備軍糧十一月癸巳太上皇帝南巡至於懷州所過問民疾苦賜高年孝悌力田布帛

延興四年二月甲辰太上皇帝至自南巡按魏書孝文帝本紀云云

延興五年冬十月太上皇帝大閱於北郊按魏書孝文帝本紀云云

承明元年太上皇帝崩按魏書孝文帝本紀云云

北齊

武成帝河清四年詔傳位於皇太子群公上尊號爲太上皇帝 按北齊書武成帝本紀河清四年四月乙亥太史奏天文有變其占當有易王景子乃使太宰段韶兼太尉持節奉皇帝璽綬傳位於皇太子大赦改元爲天統元年百官進級降罪各有差又詔太子妃斛律氏爲皇后於是羣公上尊號爲太上皇帝軍國大事咸以奉聞始將傳政使內參政子尙乘驛送詔書於鄴子尙出晉陽城見人騎隨後忽失之尙未至鄴而其言已布矣

後主天統元年太上皇帝遣使於陳詔增置官屬及改高祖廟號 按北齊書後主本紀天統元年六月己巳太上皇帝詔兼散騎常侍王季高使於陳秋七月乙未太上皇帝詔增置都水使者一人冬十一月癸未太上皇帝至自晉陽己丑太上皇帝詔改太祖獻武皇帝爲神武皇帝廟號高祖獻明皇后爲武明皇后其文宣謚號委有司議定十二月庚戌太上皇帝狩於北郊壬子狩於南郊乙卯狩於西郊壬戌太上皇帝幸晉陽

天統二年太上皇以三臺施興聖寺封太上皇諸子於藩 按北齊書後主本紀天統二年二月庚

戊太上皇帝至自晉陽三月乙巳太上皇帝詔以三臺施興聖寺以旱故降禁囚五月己亥封太上皇帝子儼爲東平王仁弘爲齊安王仁固爲北平王仁英爲高平王仁光爲淮南王六月太上皇帝詔兼散騎常侍韋道儒聘於陳秋八月太上皇帝幸晉陽

天統三年太上皇親釐庶政 按北齊書後主本紀天統三年春正月壬辰太上皇帝至自晉陽戊戌太上皇帝詔京官執事散官三品已上各舉三人五品以上各舉二人稱事七品已上及殿中侍御史尚書都檢校御史主書及門下錄事各舉一人夏四月癸丑太上皇帝詔兼散騎常侍司馬幼之使於陳五月甲午太上皇帝詔以領軍大將軍東平王儼爲尚書令六月己未太上皇帝詔封皇子仁機爲西河王仁約爲樂浪王仁儉爲潁川王仁雅爲安樂王仁統爲丹陽王仁謙爲東海王閏六月壬午太上皇帝詔尚書令東平王儼錄尚書事以尚書左僕射趙彥深爲尚書令并省尚書左僕射婁定遠爲尚書左僕射中書監徐之才爲右僕射秋八月辛未太上皇帝詔以太保任城王潛爲太師太尉馮翊王潤爲大司馬太宰段韶爲左丞相太師賀拔仁爲右丞相太傅侯莫陳相爲太宰大司馬婁叡爲太傅大將軍斛律光爲太保司徒韓祖念爲大將軍司空趙郡王叡爲太尉尚書

令東平王儼爲司徒九月己酉太上皇帝詔諸寺署所綰雜保戶姓高者天保之初雖有優勅權假力用未免者今可悉蠲雜戶任屬郡縣一准平人丁已太上皇帝幸晉陽十一月癸未太上皇帝至自晉陽十二月己巳太上皇帝詔以故左丞相趙郡王琛配享神武廟庭

天統四年太上皇仍臨朝政尋崩 按北齊書後主本紀天統四年正月癸亥太上皇帝詔兼散騎常侍鄭大護使於陳三月乙巳太上皇帝詔以司徒東平王儼爲大將軍南陽王綽爲司徒開府儀同三司徐顯秀爲司空開府儀同三司廣寧王孝珩爲尚書令夏四月辛巳太上皇帝幸晉陽五月壬戌太上皇帝至自晉陽秋九月景申周人來通和太上皇帝詔侍中斛斯文略報聘於周冬十一月壬辰太上皇帝詔兼散騎常侍李翥使於陳十二月辛未太上皇帝崩

隆化元年後主禪位皇太子稱太上皇帝又稱爲無上皇 按北齊書後主本紀隆化元年高元海宋士素盧思道李德林等欲議禪位皇太子先是望氣者言當有革易於是依天統故事授位幼主幼主名恒帝之長子也春正月乙亥卽皇帝位時八歲改元爲承光元年大赦尊皇太后爲太皇太后帝爲太上皇帝后爲太上皇后於是黃門侍郎顏之推中書侍郎薛道衡侍中陳德勝等勸太上

皇帝往河外募兵更爲經略若不濟南投陳國從之丁丑太皇太后太上皇自鄴先趨濟州周師漸逼癸未幼主又自鄴東走乙丑周師至紫陌橋癸巳燒城西門太上皇將百餘騎東走乙亥渡河入濟州其日幼主禪位於大丞相任城王潛令侍中斛律孝卿送禪文及璽綬於瀛州孝卿乃以之歸周又爲任城王詔尊太上皇爲無上皇幼主爲守國天王留太皇太后濟州遣高阿那肱留守太上皇并皇后攜幼主走青州韓長鸞鄧願等數十人從太上皇既至青州卽爲入陳之計而高阿那肱召周軍約生致齊主而屢使人告言賊軍在遠已令人燒斷橋路太上所以停緩周軍奄至青州太上窘急將遜於陳置金囊於鞍後與長鸞淑妃等十數騎至青州南鄧村爲周將尉遲綱所獲送鄴周武帝與抗賓主禮并太后幼主諸王俱送長安封帝溫國公

### 北周

宣帝大象元年詔傳位於皇太子自稱天元皇帝 按周書宣帝本紀大象元年春二月辛巳詔曰有聖大寶實惟重器元天表命人事與能幽顯同謀確乎不易域中之大寶懸定於杳冥天下爲公蓋不避於內舉我大周感蒼昊之精受河洛之錫武功文德光格區宇創業垂統永光無窮朕以寡

薄祇承鴻緒上賴先朝得一之迹下藉羣后不貳之心職貢與雲雨俱通憲章共光華並亘圓首方足咸登仁壽思隆國本用弘天曆皇太子衍地居上嗣正統所歸遠憑積德之休允叶無疆之祚帝王之量未肅而成天祿之期不謀已至朕今傳位於衍乃瞻四海深合謳歌之望俾予一人高蹈風塵之表萬方兆庶知朕意焉可大赦天下改大成元年爲大象元年帝於是自稱天元皇帝所居稱天臺冕有二十四旒室服旗鼓皆以二十四爲節內史御正皆置上大夫皇帝衍稱正陽宮置納言御正諸衛等官皆准天臺尊皇太后爲天元太后

大象二年帝自稱爲天元皇帝凡制勅稱謂槩以天大爲號 按周書宣帝本紀大象二年二月乙丑改制詔爲天制詔勅爲天勅壬午尊天元皇太后爲天元上皇太后天皇太后李氏曰天元聖皇太后癸未立天元皇后楊氏爲天元太皇后天皇后朱氏爲天大皇后天右皇后元氏爲天右大皇后天左皇后陳氏爲天左大皇后正陽宮皇后直稱皇后三月庚子詔天臺侍衛之官皆著五色及紅紫綠衣以雜色爲緣名曰品色衣有大事與公服間服之壬寅詔內外命婦皆執笏其拜宗廟及天臺皆俛伏甲辰初置天中大皇后立天左大皇后陳氏爲天中大皇后立妃尉遲氏爲天左大皇

后每對臣下自稱爲天以五色土塗所御天德殿各隨方色又於後宮與皇后等列坐用宗廟禮器  
籩彝珪瓚之屬以飲食焉又令羣臣朝天臺者皆致齋三日清身一日車旗章服倍於前王之數既  
自比上帝不欲令人同己嘗自帶綬及冠通天冠加金附蟬顧見侍臣武弁上有金蟬及王公有綬  
者並令去之又不聽人有高大之稱諸姓高者改爲姜九族稱高祖者爲長祖曾祖爲次長祖官名  
凡稱上及大者改爲長有天者亦改之又令天下車皆以渾成木爲輪禁天下婦人皆不得施粉黛  
之飾唯宮人得乘有輻車加粉黛焉每笞捶人皆以百二十爲度名曰天杖宮人內職亦如之

隋

煬帝大業十三年遙尊帝爲太上皇 按隋書煬帝本紀大業十三年十一月景辰唐公入京師辛  
酉遙尊帝爲太上皇立代王侑爲帝 按恭帝本紀煬帝親征遼東令代王於京師總留事十一年  
從幸晉陽拜太原太守尋鎮京師義兵入長安尊煬帝爲太上皇奉帝纂業

恭帝義寧元年代王以奉太上皇明詔卽皇帝位 按隋書恭帝本紀義寧元年十一月王戊上卽  
皇帝位於大興殿詔曰王道喪亂天步不康古往今來代有其事屬之於朕逢此百罹彼蒼者天胡

寧斯忍襁褓之歲夙遭憫凶孺子之辰太上播越興言感動實疚於懷太尉唐公膺期作宰時稱舟楫大拯橫流糾合義兵翼戴皇室與國休戚再匡區夏爰奉明詔弼予幼冲顯命光臨天威咫尺對揚尊號悼心失圖一人在遠三讓不遂僂俛南面厝身無所苟利社稷莫敢或違俯從羣議奉遵聖旨可大赦天下改大業十三年爲義寧元年

義寧二年太上皇被弑江都 按隋書恭帝本紀義寧二年三月右屯衛將軍宇文化及弑太上皇於江都宮五月詔曰天禍隋國大行太上皇遇盜江都酷甚望夷聲深驅北憫予小子奄逮丕譽哀號承感心情靡潰仰惟荼毒仇復靡申形影相弔罔知啟處相國唐王膺期命世扶危拯溺自北徂南東征西怨總九合於一匡決百勝於千里糾率夷夏大庇氓黎保乂朕躬繄王是賴德侔造化功格蒼旻兆庶歸心曆數斯在屈爲人臣載違天命在昔虞夏揖讓相推苟非重華誰堪命禹當今九服崩離三靈改卜大運去矣請避賢路兆謀布德顧已莫能私僮命駕須歸藩國予本代王及予而代天之所廢豈期如是庶憑稽古之聖以誅四凶聿值惟新之恩預充三恪雪冤恥於皇祖守禋祀爲孝孫朝聞夕殞及泉無恨今遵故事遜於舊邸庶官羣辟改事唐朝宜依前典趣上尊號若釋重

負感泰兼懷假手真人俾除醜逆濟濟多士明知朕意

唐

高祖武德九年八月詔傳位於皇太子太宗卽位尊帝爲太上皇 按舊唐書高祖本紀武德九年六月庚申秦王以皇太子建成與齊王元吉同謀害己率兵誅之詔立秦王爲皇太子總統萬機大赦天下八月癸亥詔傳位於皇太子尊帝爲太上皇

太宗貞觀三年四月乙亥太上皇徙居於大安宮 按唐書太宗本紀云云

貞觀四年七月甲戌太上皇不豫廢朝十月辛卯獵於貴泉谷甲辰獵於魚龍川獻獲於大安宮  
按唐書太宗本紀云云

貞觀七年帝奉太上皇置酒未央宮 按唐書太宗本紀不載 按通鑑綱目貞觀七年十二月帝

從上皇宴漢未央宮上皇命頡利可汗起舞馮智戴詠詩既而笑曰胡越一家古未有也帝捧觴上壽曰此皆陛下教誨非臣智力所及昔漢高祖亦從太上皇宴此宮妾自矜大臣不取也上皇大悅

智戴南蠻酋長馮益之子  
也先益遣入侍故入侍宴

貞觀八年十二月丁卯從太上皇闖武於城西 按唐書太宗本紀云云

貞觀九年五月庚子太上皇崩 按唐書太宗本紀云云 按文獻通考上皇居大安宮上屢請上皇避暑九成宮上皇以隋文帝終於彼惡之乃營大明宮以爲上皇清暑之所未成而上皇寢疾不果居九年崩

睿宗延和元年八月庚子立皇太子爲皇帝以聽小事自尊爲太上皇以聽大事 按唐書睿宗本紀云云

按元宗本紀睿宗卽位立爲皇太子景雲二年監國聽除六品以下官延和元年星官言帝座有變睿宗曰傳德避災吾意決矣七月壬辰制皇太子宜卽皇帝位太子惶懼入請睿宗曰此

吾所以答天戒也皇太子乃御武德殿除三品以下官八月庚子卽皇帝位十月庚子享於太廟大赦 按文獻通考睿宗在位二年制傳位於太子太子上表固辭太平公主勸上雖傳位猶宜總

大政上乃謂太子曰汝以爲天下事重欲朕兼理之耶昔舜禪禹猶親巡狩朕雖傳位豈忘國家其軍國大事當兼省之八月庚子元宗卽位尊睿宗爲太上皇上皇自稱曰朕命曰誥五日一受朝於太極殿皇帝自稱曰予命曰制勅日受朝於武德殿三品以上除授及大刑政決於上皇餘皆決於

皇帝

先天二年七月乙丑誥歸政於皇帝 按唐書睿宗本紀云云 按文獻通考七月上誅太平公主及其黨上皇誥自今軍國政刑一皆取皇帝處分朕方無爲養志以遂素心是月徙居百福殿元宗開元二年六月甲子以太上皇避暑徙御大明宮 按唐書元宗本紀云云

開元四年正月朝太上皇於西宮六月甲子太上皇崩 按唐書元宗本紀云云

天寶十五載八月肅宗卽位於靈武尊皇帝爲上皇天帝 按唐書元宗本紀天寶十五載八月癸巳皇太子卽皇帝位於靈武以閏庚子上皇天帝誥遣韋見素房琯崔渙奉皇帝冊於靈武 按肅宗本紀天寶三載安祿山來朝太子識其有反相請以罪誅之元宗不聽祿山反十五載元宗避賊行至馬嵬父老遮道請留太子討賊元宗許之遣壽王瑁及內侍高力士諭太子太子乃還六月丁酉至渭北便橋己亥次保定庚戌次豐寧見大河之險將保之會天大風迴趨靈武七月辛酉至於靈武壬戌裴冕等請皇太子卽皇帝位甲子卽皇帝位於靈武尊皇帝曰上皇天帝十月遣永王璘朝上皇天帝於蜀郡 按文獻通考肅宗至德元年卽位於靈武尊元宗曰上皇天帝靈武使者

至蜀上皇喜曰吾兒應天順人吾復何憂制自今改制勅爲誥表疏稱太上皇四海軍國事皆先取  
皇帝進止仍奏朕知俟克復兩京迎上皇朕不復預事命韋見素房琯崔渙奉傳國寶玉冊詣靈武傳位  
肅宗至德二載克復兩京迎上皇於蜀居興慶宮 按唐書肅宗本紀至德二載十月癸亥遣太子  
太師韋見素迎上皇天帝於蜀郡丁卯至自靈武饗於太廟哭三日十二月丙子上皇天帝至自蜀  
郡 按文獻通考至德二載克復兩京使韋見素入蜀奉迎上皇上皇至鳳翔從兵六百餘人上  
皇命悉以甲兵輸郡庫上發精騎三千奉迎十二月丙午上皇至咸陽上備法駕迎於望賢宮上皇  
在宮南樓上釋黃袍著紫袍望樓下馬趨進拜舞於樓下上皇降樓撫上而泣上捧上皇足嗚咽不  
自勝上皇索黃袍自爲上著之上伏地頓首固辭上皇曰天數人心皆歸於汝使朕得保養餘齒汝  
之孝也上不得已受之父老在仗外歡呼且拜上令開仗縱千餘人入謁上皇曰臣等今日復覩二  
聖死無恨矣上皇不肯居正殿曰此天子之位也上固請自扶上皇登殿尚食進食上品嘗而薦之  
丁未將發行宮上親爲上皇習馬而進之上皇上馬上親執鞭行數步上皇止之上乘馬前引不敢  
當馳道上皇謂左右曰吾爲天子五十年未爲貴今爲天子父乃貴耳左右皆呼萬歲上皇自開遠

門入大明宮御含元殿慰撫百官乃詣長樂殿九廟主慟哭久之卽日幸興慶宮遂居

乾元元年上皇授皇帝傳國寶帝上上皇冊號 按唐書肅宗本紀乾元元年正月戊寅上皇天帝  
御宣政殿授皇帝傳國受命寶符冊號曰光天文武大聖孝感皇帝乙巳上上皇天帝冊號曰聖  
天帝

上元元年七月丁未聖皇天帝遷於西內 按唐書肅宗本紀云云 按李輔國傳太上皇居興慶  
宮帝自複道來起居太上皇亦間至大明宮或相逢道中帝命陳元禮高力士王承恩魏悅玉真公  
主常在太上皇左右梨園弟子日奏聲伎爲娛樂輔國素微賤雖暴貴力士等猶不爲禮怨之欲立  
奇功自固初太上皇每置酒長慶樓南俯大道因徘徊觀覽或父老過之皆拜舞乃去上元中劍南  
奏事吏過樓下因上謁太上皇賜之酒詔公主及如仙媛主之又召郭英乂王銑等飲賚予頗厚輔  
國因妄言於帝曰太上皇居近市交通外人元禮力士等將不利陛下六軍功臣反側不自安願徙  
太上皇入禁中帝不寤先時興慶宮有馬三百輔國矯詔取之裁留十馬太上皇謂力士曰吾兒用  
輔國謀不得終孝矣會帝屬疾輔國卽詐言皇帝請太上皇按行宮中至睿武門射生官五百遮道